



宋 宣 城 太 守 范 曄 撰

唐 章 懷 太 子 賢 注

章帝八王傳第四十五

孝章皇帝八子宋貴人生清河孝王慶梁貴人生和帝申貴人生濟北惠王壽河間

孝王開四王不載母氏

千乘貞王伉傳

千乘貞王伉建初四年封和帝即位以伉長兄甚見尊禮立十五年薨子寵嗣一名

伏胡永元七年改國名樂安立二十八年薨是為夷王父子薨于京師皆葬洛陽子

鴻嗣安帝崩始就國鴻生質帝質帝立梁太后下詔以樂安國土卑溼租委鮮薄改

鴻封勃海王委謂委也立二十六年薨是為孝王無子太后立桓帝弟蠡吾侯惲為勃

海王奉鴻祀惲蠡吾侯翼子河間王開孫也延熹八年惲謀為不道有司請廢之帝不忍乃貶為廩

陶王食一縣惲後因中常侍王甫求復國許謝錢五十萬帝臨崩遺詔復為勃海王

惲知非甫功不肯還謝錢甫怒陰求其過初迎立靈帝道路流言惲恨不得立欲鈔

徵書而中常侍鄭颯音立中黃門董騰並任俠通剽輕數與惲交通剽疾王甫伺察以

爲有姦密告司隸校尉段熹平元年遂收颯送北寺獄

北寺獄名屬黃門署前使書音義曰即若盧獄也

尚書令廉忠誣奏颯等謀迎立惺大逆不道遂詔冀州刺史收惺考實又遣大鴻臚

持節與宗正廷尉之勃海迫責惺惺自殺妃妾十一人子女七十人伎女二十四人

皆死獄中傅相以下以輔導王不忠悉伏誅惺立二十五年國除衆庶莫不憐之

### 平春悼王全傳

平春悼王全

續漢志平春縣屬江夏郡也

以建初四年封其年薨葬於京師無子國除

### 清河孝王慶傳

清河孝王慶母宋貴人貴人宋昌八世孫扶風平陵人也

昌文帝時爲中尉以代邸功封壯武侯

父楊

以恭孝稱於鄉閭不應州郡之命楊姑即明德馬后之外祖母也馬后聞楊二女皆

有才色迎而訓之永平末選入太子宮甚有寵肅宗即位並爲貴人建初三年大貴

人生慶明年立爲皇太子徵楊爲議郎褒賜甚渥貴人長於人事供奉長樂宮身執

饋饌太后憐之太后崩後竇皇后寵盛以貴人姊妹並幸慶爲太子心內惡之與母

比陽主謀陷宋氏

比陽主東海王疆女

外令兄弟求其纖過內使御者偵伺得失

偵候也音丑政反廣雅曰

也偵問後於夜庭門邀遮得貴人書云病思生菟令家求之因誣言欲作蠱道祝詛以

菟爲厭勝之術日夜毀譖貴人母子遂漸見疏慶出居承祿觀數月竇后諷掖庭令

誣奏有事請加驗實七年帝遂廢太子慶而立皇太子肇肇梁貴人子也乃下詔曰

皇太子有失惑無常之性爰自孩乳至今益章恐襲其母凶惡之風不可以奉宗廟

為天下主大義滅親况降退乎左傳衛石碏殺其子厚君子曰石碏純臣也惡州吁而厚預焉大義滅親其是之謂乎今廢慶

為清河王皇子肇保育皇后承訓懷衽導達善性將成其器蓋庶子慈母尚有終身

之恩儀禮喪服曰慈母如母謂妾子之無母父命妾養之故曰慈母如母者貴父之命也豈若嫡后事正義明哉今以肇為皇

太子遂出貴人姊妹置丙舍使小黃門蔡倫考實之皆承諷旨傳致其事傳讀日附乃載

送暴室二貴人同時飲藥自殺續漢志曰暴室署名主中婦人疾病也帝猶傷之勅掖庭令葬於樊濯

聚在洛陽城北也於是免楊歸本郡郡縣因事復捕繫之楊友人前懷令山陽張峻左馮翊

沛國劉均等奔走解釋得以免罪楊失志憔悴卒于家慶時雖幼而知避嫌畏禍言

不敢及宋氏帝更憐之勅皇后令衣服與太子齊等太子特親愛慶八則共室出則

同輿及太子即位是為和帝待慶尤渥諸王莫得為比常共議私事後慶以長別居

丙舍永元四年帝移幸北宮章德殿講於白虎觀慶得入省宿止帝將誅竇氏欲得

外戚傳前書外戚傳也懼左右不敢使乃令慶私從千乘王求夜獨內之又令慶傳語中常

侍鄭眾求索故事謂文帝誅薄昭武帝誅竇嬰故事及大將軍竇憲誅慶出居邸賜奴婢三百人與

馬錢帛帷帳珍寶玩好充仞其第又賜中傅以下至左右錢帛各有差前書音義曰中傅宦者也

乞逢回平交判

慶多被病或時不安帝朝夕問訊進膳藥所以垂意甚備慶小心恭孝自以廢黜尤  
畏事慎法每朝謁陵廟常夜分嚴裝衣冠待明也分半約勅官屬不得與諸王車騎競

驅常以貴人葬禮有關每竊感恨至四節伏臘輒祭於私室竇氏誅後始使乳母於

城北遙祠及竇太后崩慶求上冢致哀帝許之詔太官四時給祭具慶垂涕曰生雖

不獲供養終得奉祭祀私願足矣欲求作祠堂恐有自同恭懷梁后之嫌遂不敢言

恭懷梁后和帝母梁貴人常泣向左右以為沒齒之恨沒終齒年也後上言外祖母王年老遭憂病下

土無盤藥願乞詣洛陽療疾於是詔宋氏悉歸京師除慶舅衍俊蓋暹等皆為郎十

五年有司以日食陰盛奏遣諸王侯就國詔曰甲子之異責由一人諸王勿稚早離

顧復弱冠相育詩小雅曰父兮生我母兮鞠我顧我復我出入腹我常有蓼莪凱風之哀詩小雅曰蓼莪者我

生我劬勞詩國風曰凱風自南吹彼棘心棘心天天母氏劬勞選懦之恩知非國典且復須留選懦仁弱慈戀不決之意也懦音仁充反

東觀記須留作宿留至冬從祠章陵詔假諸王羽林騎各四十人後中傳衛訢私為臧盜千餘

萬詔使案理之并責慶不舉之狀慶曰訢以師傅之尊選自聖朝臣愚唯知言從事

聽不甚有所糾察帝嘉其對悉以訢臧財賜慶及帝崩慶號泣前殿嘔血數升因以

發病明年諸王就國鄧太后特聽清河之置中尉內史賜什物皆取乘輿上御以宋

衍等並為清河中大夫續漢書曰中大夫秩六百石無員掌奉王使至京師慶到國下令寡人生於深宮長於

朝廷

魯哀公與孔子言曰寡人生于深宮之中長於婦人之手事仰待明主垂拱受見孫卿子也。劉放曰正文到國下令寡人案文少一日字仰待明主垂拱受

成

垂拱言其寫也尚書曰垂拱仰成

既以薄祐早離顧復屬遭大憂

屬近也

悲懷感傷蒙恩大國職惟

藩輔新去京師憂心煢煢夙夜屏營未知所立

煢煢孤特也屏營仿惶也

蓋聞智不獨理必須明

賢今官屬並居爵任失得是均庶望上遵策戒下免悔咎其糾督非枉明察典禁無

令孤獲怠慢之罪焉鄧太后以殤帝襁抱遠慮不虞

襁以繪帛為之即今之小兒襁也繡音必衡反

留慶長

子祐與嫡母耿姬居清河邸至秋帝崩立祐為嗣是為安帝太后使中黃門送耿姬

歸國帝所生母左姬字小娥小娥姊字大娥健為人初伯父聖坐妖言伏誅家屬沒

官二娥數歲入掖庭及長並有才色小娥善史書喜辭賦和帝賜諸王宮人因入清

河第慶初聞其美賞傅母以求之及後幸愛極盛姬妾莫比姊妹皆卒葬於京師慶

立凡二十五年乃歸國其年病篤謂宋衍等曰清河埤薄

埤音婢

欲乞骸骨於貴人家

傍下棺而已朝廷大恩猶當應有祠室庶母子并食魂靈有所依庇死復何恨乃上

書太后曰臣國土下溼願乞骸骨下從貴人於樊濯雖歿且不朽矣及今口目尚能

言視冒昧于請命在呼吸願蒙哀憐遂薨年二十九遣司空持節與宗正奉弔祭又

使長樂謁者僕射中謁者二人副護喪事賜龍旂九旒虎賁百人儀比東海恭王

旒

九旒天子制也恭王彊葬贈以殊禮升龍旄頭鸞輅龍旂虎賁百人

太后使掖庭丞送左姬喪與王合葬廣丘子愍王

乾隆四年校刊

後漢書卷八十五 列傳

三



虎威嗣永初元年太后封宋衍爲盛鄉侯分清河爲二國封慶少子常保爲廣川王

子女十一人皆爲鄉公主食邑奉明年常保薨無子國除虎威立三年薨亦無子鄧

太后復立樂安王寵子延平爲清河王是爲恭王寵即千乘王伉之子太后崩有司上言清河

孝王至德淳懿載育明聖承天奉祚爲郊廟主漢興高皇帝尊父爲太上皇宣帝號

父爲皇考宣帝父諱進武帝時號史皇孫坐展太子事遇害帝即位追尊皇考立廟序昭穆置園邑太宗之義舊章不忘

太宗謂繼嗣也左傳季桓子曰舊章不可忘也宜上尊號曰孝德皇皇妣左氏曰孝德后孝德皇母宋貴人

追諡曰敬隱后乃告祠高廟使司徒持節與大鴻臚奉策書璽綬清河追上尊號又

遣中常侍奉太牢祠典護禮儀侍中劉珍等及宗室列侯皆往會事尊陵曰甘陵廟

曰昭廟置令丞設兵車周衛比章陵皇考南頓君陵復以廣川益清河國尊耿姬爲甘陵大

貴人又封女弟侍男爲涅陽長公主別得爲舞陰長公主久長爲濮陽長公主直得

爲平氏長公主餘七主並早卒故不及進爵追贈敬隱后女弟小貴人印綬追封諡

宋楊爲當陽穆侯當陽今荆州也楊四子皆爲列侯食邑各五千戶宋氏爲卿校侍中大夫

謁者郎吏十餘人孝德后異母弟次及達生二人諸子九人皆爲清河國郎中耿貴

人者半平侯舒之孫也貴人兄寶襲封牟平侯帝以寶嫡舅寵遇甚渥位至大將軍

事已見耿舒傳立三十五年薨劉放曰案文少延平兩字子蒜嗣沖帝崩徵蒜詣京師將議爲

嗣會大將軍梁冀與梁太后立質帝罷歸國蒜爲人嚴重動止有度朝臣太尉李固等莫不歸心焉初中常侍曹騰謁蒜蒜不爲禮宦者由此惡之及帝崩公卿皆正義立蒜而曹騰說梁冀不聽遂立桓帝語在李固傳蒜由此得罪建和元年甘陵人劉文與南郡妖賊劉鮪交通訛言清河王當統天下欲共立蒜事發覺文等遂劫清河相謝暲將至王宮司馬門帝紀謝作射蓋紀傳不同曰當立王爲天子暲爲公暲不聽罵之文因刺殺暲於是捕文鮪誅之有司因劾奏蒜坐貶爵爲尉氏侯徙桂陽自殺立三年國絕梁冀惡清河名明年乃改爲甘陵梁太后立安平孝王子經侯理爲甘陵王安平王德

濟北惠王壽傳

濟北惠王壽母申貴人潁川人也世吏二千石貴人年十三入掖庭壽以永元二年封分太山郡爲國和帝遵肅宗故事兄弟皆留京師恩寵篤密有司請遣諸王歸藩不忍許之及帝崩乃就國永初元年鄧太后封壽舅申轉爲新亭侯壽立三十一年薨自永初已後戎狄叛亂國用不足始封王薨減賻錢爲千萬布萬匹嗣王薨五百



萬布五千匹時唯壽最尊親特賻錢三萬布三萬匹子節王登嗣永寧元年封登弟五人為鄉侯皆別食太山邑登立十五年薨子哀王多嗣多立三年薨無子永和

四年立戰鄉侯安國為濟北王是為釐王釐音僖也安國立十年薨子孝王次嗣本初元

年封次弟猛為亭侯次九歲喪父至孝建和元年梁太后下詔曰濟北王次以幼年

守藩躬履孝道父沒哀慟焦毀過禮草廬土席衰杖在身頭不枇沐體生瘡腫諒闇

已來二十八日自諸國有憂未之聞也朝廷甚嘉焉書不云乎用德章厥善尚書盤庚之辭

也言以道德明之使競為善也詩云孝子不匱永錫爾類詩大雅也匱竭也類善也永長也孝子之行無有匱竭長賜與汝之族類教道天下

今增次封五千戶廣其土宇以慰孝子惻隱之勞次立七年薨子鸞嗣鸞薨子政嗣

政薨無子建安十一年國除

河間孝王開傳

河間孝王開以永元二年封分樂成勃海涿郡為國延平元年就國奉遵法度吏人

敬之永寧元年鄧太后封開子翼為平原王奉懷王勝祀勝和帝子子德為安平王奉樂

成王黨祀黨明帝子也開立四十二年薨子惠王政嗣政傲狠不奉法憲順帝以侍御史

吳郡沈景有彊能稱故擢為河間相景到國謁王王不正服箕踞殿上侍郎贊拜景

時不為禮時立也問王所在虎賁曰是非王邪景曰王不服常人何別劉放曰王不服案文少一王

字今相謁王豈謁無禮者邪王慙而更服景然後拜出住宮門外請王傳責之日前

發京師陛下見受詔以王不恭使相檢督諸君空受爵祿而無訓導之義因奏治罪

詔書讓政而詰責傅景因捕諸姦人上案其罪上奏上也音市丈反殺戮尤惡者數十人出寬

獄百餘人政遂爲改節悔過自修陽嘉元年封政弟十三人皆爲亭侯政立十年薨

子貞王建嗣建立十年薨子安王利嗣利立二十八年薨子陔嗣陔立四十一年魏

受禪以爲崇德侯蠡吾侯翼元初六年鄧太后徵濟北河間王諸子詣京師奇翼美

儀容故以爲平原懷王後焉平原王得無子故立之也留在京師歲餘太后崩安帝乳母王聖與

中常侍江京等譖鄧騭兄弟及翼云與中大夫趙王謀圖不軌闚覲神器懷大逆心

神器喻帝位也老子曰天下神器不可爲也貶爲都鄉侯遣歸河間翼於是謝賓客閉門自處永建五年

父開上書願分蠡吾縣以封翼順帝從之翼卒子志嗣爲太將軍梁冀所立是爲桓

帝梁太后詔追尊河間孝王爲孝穆皇夫人趙氏曰孝穆后廟曰清廟陵曰樂成陵

蠡吾先侯曰孝崇皇廟曰烈廟陵曰博陵皆置令丞使司徒持節奉策書璽綬祠以

太牢建和二年更封帝兄都鄉侯碩爲平原王留博陵奉翼後尊翼夫人馬氏爲孝

崇博園貴人以涿郡之良鄉故安河間之蠡吾三縣爲湯沐邑碩嗜酒多過失帝令

馬貴人領王家事建安十一年國除解瀆亭侯淑以河間孝王子封淑卒子長嗣劉

放日案紀長作葛他書亦然明此誤長卒子宏嗣為大將軍寶武所立是為靈帝建寧元年寶太后詔追尊皇祖淑為孝元皇夫人夏氏曰孝元后陵曰敦陵廟曰靖廟皇考長為孝仁皇夫人董氏為慎園貴人陵曰慎陵廟曰奠廟皆置令丞使司徒持節之河間奉策書璽綬祠以太牢常以歲時遣中常侍持節之河間奉祠熹平二年使使拜河間安王利子康為濟南王奉孝仁皇祀康薨子贊嗣建安十二年為黃巾賊所害子開嗣立十三年魏受禪以為崇德侯

城陽懷王淑傳

城陽懷王淑以永元二年分濟陰為國立五年薨葬於京師無子國除還并濟陰

廣宗殤王萬歲傳

廣宗殤王萬歲以永元五年封分鉅鹿為國其年薨葬於京師無子國除還并鉅鹿

平原懷王勝傳

平原懷王勝和帝長子也不載母氏少有痼疾延平元年封立八年薨葬於京師無子鄧太后立樂安夷王寵子得為平原王奉勝後是為哀王得立六年薨無子永寧元年太后又立河間王開子都鄉侯翼為平原王嗣安帝廢之國除

論曰傳稱吳子夷昧甚德而度有吳國者必其子孫夷昧吳君之名左傳屈狐庸謂趙文子曰若天所啓其在今嗣

君乎甚德而度德不失人度不失事有吳國者  
必此君之子孫也杜預注云嗣君謂夷昧也  
章帝長者事從敦厚繼祀漢室咸其  
苗裔古人之言信哉

贊曰章祚不已本枝流祉質惟伉孫安亦慶子河間多福桓靈承祀濟北無驕皇恩

寵饒平原抱痼三王薨朝平春王全廣宗王萬歲城陽王淑並薨於京師也振振子孫或秀或苗振振仁厚貌也音之

人反詩國風日宜爾子孫振振兮論語日苗而不秀者有矣夫秀而不實者有矣夫苗謂早天秀謂成長也



後漢書卷八十五考證

干乘貞王伉傳奉鴻祀○祀北宋本作嗣

清河孝王慶傳父楊○按楊北宋本作揚

太宗之義○何焯校本改大

河間孝王開傳與中大夫趙王○王字疑當作玉鄧太后紀有宮人趙玉



後漢書卷八十五考證

後漢書卷八十六

宋 宣 城 太 守 范 曄 撰

唐 章 懷 太 子 賢 注

張王种陳列傳第四十六

張皓傳 子綱

張皓字叔明健為武陽人也六世祖良高帝時為太子少傅封留侯皓少游學京師

初永元中歸仕州郡 ○劉敞曰案文多一初字 辟大將軍鄧騭府五遷尚書僕射職事八年出為

彭城相 明帝子彭城王恭之相也 永寧元年徵拜廷尉皓雖非法家而留心刑斷數與尚書辯正

疑獄多以詳當見從 詳審而平當也 時安帝廢皇太子為濟陰王皓與太常桓焉太僕來歷

廷爭之不能得事已具來歷傳退而上疏曰昔賊臣江充造構讒逆至令戾園興兵

終及禍難 趙人江充字次倩武帝時為直指繡衣劾太子家吏行馳道中恐為太子所誅見上年老意多所惡因言左右皆為巫蠱上乃使充捕案巫蠱既知

上意太子乃言宮中有蠱氣遂掘蠱太子宮得桐木人時上疾在甘泉宮太子懼不能自明收充斬之發兵與丞相劉屈氂戰敗亡走湖自殺後太子孫宣帝即位追諡

太子曰戾於湖置園 後壺關三老一言上乃覺悟雖追前失悔之何逮 逮及也太子死後壺關三

老令狐茂上書訟太子寃武帝感悟憐太子無辜乃族滅江充 今皇太子春秋方始

十歲未見保傅九德之義 尚書臯陶陳九德曰寬而慄柔而立愿而恭亂而敬擾而毅直而溫簡而廉剛而塞彊而誼也 宜簡賢輔

就成聖質書奏不省及順帝卽位拜皓司空在事多所薦達天下稱其推士時清河趙騰上言災變譏刺朝政章下有司收騰繫考所引黨輩八十餘人皆以誹謗當伏

重法皓上疏諫曰臣聞堯舜立敢諫之鼓三王樹誹謗之木春秋採善書惡聖主不

罪芻蕘左氏傳曰春秋之稱微而顯志而騰等雖干上犯法所言本欲盡忠正諫如

當誅戮天下杜口塞諫爭之源非所以昭德示後也帝乃悟減騰死罪一等餘皆司

寇前書音義曰司寇二歲刑也輪作司寇因以名焉四年以陰陽不和策免陽嘉元年復爲廷尉其年卒官

時年八十三遣使者弔祭賜葬地於河南縣子綱

綱字文紀少明經學雖爲公子而厲布衣之節舉孝廉不就司徒高第辟爲御史時

順帝委縱宦官有識危心綱常感激慨然歎曰穢惡滿朝不能奮身出命埽國家之

難雖生吾不願也退而上書曰詩曰不愆不忘率由舊章詩大雅也愆過也率循也言成王令德不過循用舊

典之文尋大漢初隆及中興之世文明二帝德化尤盛觀其理爲易循易見但恭儉守

節約身尚德而已中官常侍不過兩人近倖賞賜裁滿數金惜費重人故家給人足

夷狄聞中國優富任信道德所以姦謀自消而和氣感應而頃者以來不遵舊典無

功小人皆有官爵富之驕之而復害之非愛人重器承天順道者也器謂車服也言無功小人不可

妄授也左傳曰唯器與各不可以假人也伏願陛下少留聖思割損左右以奉天心書奏不省漢安元年